



STINAPA TA INFORMA

E 'BIKER'

E tata di 2 yu i esposo su 'bida largu'? Kore disfrutá di naturalesa riba su Harley Davidson. Norman Evertsz, konosí pa su empresa di takser, ta realisá e balor di naturalesa boneriano. "Sigur, sigur!", ta su kontesta ora puntr'é si e ta orguyoso di naturalesa boneriano. Segun Norman, nos mester di dje pa un bida saludable. Boneiru tin un bon nòmber den eksterior den sentido ekológiko. Speshalmente bou di awa ta masha konosí. Antes tabata duel e ku no tabata permití pa tira piská, pero awo e ta komprondé. E ta gusta masha pa snòrkel na kasi tur parti di Boneiru. Speshalmente e parti nort manera Karpata, Trapi i Playa Funchi. E kosta Nort-Wèst e ta haña masha bunita mes. Naturalesa, segun Norman ta sigur importante pa nos ekonomia. Speshalmente den sektor turístiko. Eko-turismo ta trese entrada i sigur tambe pa su propio negoshi ya ku hendenan ta kumpra, bende i laga drecha kas. E hendenan aki hopi biaha a konosé Boneiru via di nos turismo i personanan lokal ta haña entrada dor di turismo i por kumpra kas èts. Norman ta kouteloso ora e bisa ku e ta di opinion si ku mester sakrifiká algu di nos naturalesa pa desaroyo di ekonomia. E ta kere fuertemente den trahamentu di playa pa atraé mas turista. No mester hasié di mas manera otro islanan pero si e ta kere den diversifikashon. E kier mas splikashon tokante santu di playa ku ta malu pa koral. Un banda e ta haña lástima ku si nos duna parti di nos naturalesa pa desaroyo, anto nos tin chèns di haña nos ku kriminalidat, lus di trafiko ets. Pa Norman ta difisil pa indiká kon leu nos por bai. Nos mester di trabou pa nos bonerianonan ku ta studia i ku kier bini bèk. Pues mester di mas desaroyo ekonómiko, nan no por 'kome bientu'. Pero un kos si e ta kompletamente di akuerdo: pa nos krea ménos daño posibel na nos naturalesa ora di desaroyo.

Skirbí pa Natalie Wanga

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALES



Traha huntu na un desaroyo duradero pa Boneiru